

欽定全唐文

欽定全唐文卷四百九目錄

崔祐甫

請召對待制官奏

奏貓鼠議

廣喪朋友議

爲皇甫中丞上永王諫移鎮牋

上宰相牋

齊昭公崔府君集序

汾河義橋記

穆氏四子講藝記

滑亭新驛碑陰記

衛尉卿洪州都督張公遺愛碑頌

并序

故常州刺史獨孤公神道碑銘

并序

代宗睿文皇帝哀冊文

祭董大使文

祭獨孤常州文

裴士淹

對大夫祭判

對不供夷盤判

內侍陳忠盛神道碑

肅宗大宣孝皇帝哀冊文

章敬皇后哀冊文

欽定全唐文卷四百九

崔祐甫

祐甫字貽孫太子賓客沔子舉進士累遷中書舍人德宗朝貶河南少尹召拜門下侍郎同中書門下平章事改中書侍郎年六十薨贈太傅諡文貞

請召對待制官奏

伏以先天二年令羣臣直日待制以備顧問自今以後准元勅文官一品以下更直待制待奏事官盡退然後趨出便於兩廊賜食待進止至酉時後放陛下閒暇之際時有

召問庶或上裨聖政

奏貓鼠議

右今日日中使吳承倩宣進止以籠盛貓鼠示百寮臣聞天生萬物剛柔有性聖人因之垂訓作則禮記郊特牲篇曰迎貓爲其食田鼠也然則貓之食鼠載在祀典以其除害利人雖微必錄今此貓對鼠不食仁則仁矣無乃失於性乎鼠之爲物晝伏夜動詩人賦之曰相鼠有體人而無禮又曰碩鼠碩鼠無食我黍其序曰貪而畏人若大鼠也臣旋觀之雖云動物異於麋鹿麋兔彼皆以時殺獲爲國

家用此鼠有害亦何愛而曲全之貓受人畜養棄職不修亦何異於法吏不勤觸邪疆吏不勤捍敵又按禮部式具列三瑞無貓不食鼠之目以此稱慶臣所未詳伏以國家化洽理平天符荐至紛綸雜沓史不絕書今茲貓鼠不可濫厠若以劉向五行傳論之恐須申命憲司察視貪吏誠諸邊候無失徼巡則貓能致功鼠不爲害臣忝樞近職司聰明不揆狂愚輒獻公議謹議

廣喪朋友議

殿中侍御史安定皇甫政字公理故尚書左丞之子文行

兼茂不忝前烈雅度精識其儔蓋寡祐甫昔年嘗爲左丞使介而公理又余之族甥故狎焉大厯七年余寓滁而公理寓楚適有來訊示余以所著喪朋友議余美其重禮義有古之遺範瞻望德門軌躅無替亦感思者之所慰幸也公理又諭余曰政自從事於文舅氏未嘗以一言見誨豈所望哉盍示今議之利病猗歟公理年未四十班在赤墀簪筆持簡爲王近臣頃又佐廉問董淮海之部名遂矣權厚矣固當緩步闊視光車美服爲貴爲達而已矣乃不遺我謏狹不略我衰憊念噬膚之戚收門吏之舊周爰諮詢



以師道見待吾亦何有但美子之求益不倦雖一勺而進  
可以浸天壤一卷之多可以鎮方域況其渺瀰既廣嶄峩  
已峻增之廓之於成名乎必矣皇甫氏有子哉因覽斯議  
忽憶永泰中於穆鄂州寧會客席與故湖南觀察韋大夫  
之晉同宴適值有發遠書者知鄭郴州旻知龐歙州濬或  
以疾而歿或遇戕於盜韋氏出涕沱若而言曰二刺史之  
晉之交友也於是斂匕箸離筵席因歸於所次而哭之三  
日人來弔之者韋則盡哀長號不徒戚容而已又間歲祐  
甫佐江南西道連帥魏尚書時屬幕中之參佐有加官者

聚合樂餌卜日爲宴宴前行人至知團練副使考功邢郎  
中宇捐館於荆南邢與魏鄉國接近且邢郎中則諸魏之  
出於尚書爲內外昆弟適受朝命爲尚書倅僕感杜實規  
平公之事將入言於府主請罷宴若不可則請徹樂卒事  
而同列之士惡我者嗤鄙之詞充牣於聽謂我樵夫農叟  
之智也好我者顰戚而相誨曰慎無以方枘施圓鑿自取  
辱焉諄諄如不能已僕懦夫也因是而自悔乃其宴也大  
庖具酒車傾鄭衛之女列於賓席之末俳優侏儒設於公  
堂之下晝日不足繼之以燭使膳夫歛來酌曰曠飲斯必

當見輿曳之無算又焉得終其詞哉使我不言適其宜也  
今者追想韋湖南猶孔門之訓其他則吾不知因縱言之  
以報公理示之義當矣又何以規議旣成客謂祐甫曰韋  
湖南魏江西二觀察頗嘗知其風味公直簡諒魏則先之  
飾情強仁韋之志也今吾子之論無乃剝魏而附韋乎且  
子魏之上介也論議不隱恐非春秋內魯故宋之義盍辨  
焉祐甫應之曰噫寧以他規我是論也吾復之熟之有日  
矣韋湖南之晉飾情強仁誠如來議禮不云乎先王制禮  
賢者俯而就之不肖者企而及之子張曰先王制禮不敢

不至焉韋氏之喪朋友縱不由衷亦與夫二者之義合矣  
吾雖欲不與其可得哉至於故府公魏尚書公直簡諒清  
身敬職郡人戴於下朝聽滿於上狼籍甚盛豈造次之所  
盡哉但於邢副使之喪若忍悲而就宴可謂哀樂失其節  
乃左氏傳所載樂祈告人曰君與叔孫其皆死乎及子招  
樂憂之謂也若情不至焉率而爲宴則禮經所謂直情而  
徑行者戎狄之道也吾雖欲勿議又不可得也且吾之所  
論者因皇甫公理所著喪朋友議故縱言及之非敢定二  
觀察之褒貶韋湖南吾取節焉而已矣來議又以吾嘗爲

魏公使介今茲著論異於春秋隱魯故宋者茲又近而非中也僕才雖不腆中臺之劇曹郎且兼柱下史有名於著定矣受命爲尚書介彌縫潤色之職事安可見責以敬故君之禮嗚呼晉悼公魏絳之君也絳戮悼公之弟韓厥趙宣之所任也厥戮宣子之僕及其終也悼公謝魏絳曰無重寡人之過宣子曰可賀我矣而絳厥無罪焉豈不慎重當公正之世論議之與刑罰當豈異哉子何見過深也嗚呼天下有至公有至當知賢而舉用之至公也臨事而平處之至當也各守其分復何尤哉自漢徐孺子於故舉主

之喪徒步千里而行一祭厚則厚矣其於傳繼非可也歷代莫之非也近日張荊州九齡又刻石而美之於是後來之受舉爲參佐者報恩之分往往過當或撓我王憲捨其親戚之罪負舉其不令子孫以竊名位背公私黨茲或近之時論從而與之通人又不救遂往而不返徐生徐生得非失中之履霜也常積憤懣因而書之

爲皇甫中丞上永王諫移鎮牋

某惶恐叩頭昔臧孫辰之詞曰賢者急病而讓夷然則當禦侮之權必居衝要受分憂之任不務懷安伏見判官李

翦稱有敎幕府移鎮江寧聞命瞿然不識其故何者逆賊安祿山稱兵犯順竊據二京王師四臨久未撲滅自河淮右轉關隴東馳詔命所傳貢賦所集必由之徑實在荆襄朝廷以大王鎮之重矣自麾旌至止政令所覃嶺嶠華夷吳楚城邑公私遠邇罔有不寧賊庭震懾莫敢南望儻左右有司謀慮未熟輕舉旄鉞僻處下流旣失居要害之津且出封疆之外專命之責大王何以任之或啓寇讐之心來爭形勝之地則行李坐隔侵軼滋多安危大端不可不慎旣往之失將且無追上皇天帝巡狩成都皇帝駐驛靈

武臣子之戀大王兼之詠棠棣之詩講晨昏之禮其地逾遠胡寧以安假使別奉絲綸猶當執奏一則逆胡間諜矯詐須防二則國步艱難折衝宜近就閒樂土恐非良圖伏惟大王天縱仁明苞含光大某所以敢申讜議輕犯威嚴伏望廣延正人俯垂考覈芻蕘之論萬一可收不勝憂憤惴迫之至謹奉牋惶恐叩頭

上宰相牋

祐甫惶恐惶恐叩頭昔諸葛孔明有言曰使一夫有尤亮之罪也嗚呼孔明以分崩離析之時事要荒割據之主尚



能恢宏王度克廣德心魚鼈咸若引爲已任千載之下以  
茲美談伏惟相公乘時間生略不世出光輔興運致於冢  
宰自明兩作離帝出於震發號施令無幽不達鼎新之業  
公實贊之煦嫗昭蘇孰不有望況祐甫當遺簪墜履之列  
懷救蛇養雀之惠雖報恩之分誓以終身而受庇之期亦  
望卒歲豈可不盡誠款使匹夫不獲而相公有孔明之憾  
哉祐甫天倫十人身處其季夙遭險釁幾不聞存沒左右  
提攜仰於兄姊頃屬中夏覆沒舉家南遷內外相從百有  
餘口長兄宰豐城間歲遭罹不淑仲姊寓吉郡周年繼以

鞠凶呱呱孤甥斬焉在疚宗兄著作自蜀來吳萬里歸復  
羈孤之日斯所依焉豈期積善之人昊天不弔門緒淪替  
山頽梁折今茲夏末宗兄辭代顧眇眇之身歸然獨在寡  
弱嬰孺前悲後泣一門之中髮首相弔捨之而去必填溝  
壑昔者建寅初吉麾蓋將西猥承嘉話曲全之施不略微  
生許其待年致身徇國豈惟寮屬斯在山川鬼神實亦聞  
之今者相公大秉化源而小人拘牽於前命進於朝無一  
塵一露之益顧於家有死如棄如之患撫心自憐淚盡成  
血儻相公以天下爲一堂也忍其向隅而傷和氣哉所以

遲迴周道欲行中止解懸之望屬在仁明藏之而不言小人之罪也一物失所伏惟相公圖之孟秋尚熱伏惟相公尊體起居萬福謹因洪州奏事官沁水府果毅徐冕奉牋塵黷清襟伏深戰灼祐甫惶恐叩頭叩頭

齊昭公崔府君集序

天以日月經緯爲文地以邱陵山川爲文剛柔雜也其施於人也鐘磬笙竽文其樂九章三贊文其禮典謨詠歌文其言國之大臣業參政本發揮皇王之道必由於文故虞有臯陶洎益稷以嘉言啓迪舜禹以降伊傅周召訓命策

誥並時而興秦之李斯著事而僻自茲厥後蜀丞相孔明  
有出師表晉司空茂先有鷓鴣賦皆輔臣之文也財成陶  
冶於是見焉我族叔父齊昭公諱日用佐命中朝光照千  
里玉山雲海迴然昭曠德宇道源深入其極弱冠鄉貢進  
士擢第周厯臺署振耀雄名元宗之在臨淄邨也公常遭  
逢於路先幾洞鑒式瞻異表還避而拜契合雲龍及唐元  
夷內難參謀輔翊天推大寶事協經綸入爲將相燮諧戡  
靜道應元臣其大才明識如是公薨五十載嗣孫起居舍  
人儒以文事主便蕃禁閹追懷前烈思有以發揚垂裕奉

昭公之文集以請焉伏覽碑頌誌論章表贊序凡五十餘  
首詩幾三百篇卓爾孤標氣高調遠若雅琴度曲衆音無  
味則我遠祖長岑濟北雕龍之美昭公能纘承矣公嗣子  
宗之學通古訓詞高典冊才氣聲華邁時獨步仕於開元  
中爲起居郎再爲尚書禮部員外郎遷本司郎中時文國  
禮十年三月終於右司郎中年位不充海內歎息儒卽右  
司之子有瓊瑩之質鸞鳳之章國家之寶也重名清貫三  
代於茲昭公之後其大矣祐甫先君左僕射與昭公道藝  
敦睦故贈答詩云棣華襲韡萼桂樹連芳根又接開其懷

鉛齊年俱賁玉祐甫之生也後不及昭公之當代儒曰叔父當代敘故敘焉

汾河義橋記

絳人有成橋於稷山縣南汾水上入境稱曰孝子詢之三十喪父母五十猶縗麻故其鄉黨捨氏不名貴之也初茲縣有具舟之役鄰邑有官修之梁自太原西河上黨平陽至於絳達於雍繇卒迫程賈人射利濟舟爲捷渡口如肆孝子川上喟然歎曰夫來者如斯其可勝紀欲速不達式在茲乎見義不爲非勇也臨難不濟非義也迺願棄家

乞諸他郡枯槁籃縷日恒歲積自河間而東陶唐儉風食  
貨艱難閭里褊小率令遠邇馳驟饋餉耆耄喻美於編戶  
丁男捨耒而攻木義聲感也汾流湯湯河澌牽引潰沙徙  
岸呀呷轉騰畚築於激射之旁根柱於沸渭之下是慮是  
圖功就其十八九矣其年秋七月天作靈雨湍悍襄陵噫  
大水不仁前功蕩矣邑老鄉人涕泗而弔之曰力竭於子  
天不恤是而今已矣顧而不應且有後圖徵詩人之嘉謀  
參作者之遠慮曳索辯篋繫舟戾舸白露下而謀始止於  
凌澌壯春冰解而興功止於水潦降一夫不可奪志三年

其有成功廣可方軌平可轉轂去其飾成無丹獲取其固  
勢異虹蜺僉義於孝子之功也故曰義橋昔周王以懿戚  
封建吳札美盛德遺人西臨孟津北對姑射山河風土其  
肯徒然所以義表專門功烈鄰境難其一善矧乃兼之由  
是縣人誌之於石

穆氏四子講藝記

檢校祕書少監兼和州刺史侍御史河南穆寧字子寧以  
正直登朝以嚴明作牧斯歷陽之人弗惟奉承侍御史之  
符候持三尺律期於禁暴懲姦而已迺能廣吾君之德靖



人於教化教化之興始於家庭延於邦國事之體大且非  
謏聞者之所及也請言其家之教化焉使君有四子曰贊  
曰質曰賡曰賞聳秀之姿若瑤林植庭雪羽馴廡克岐克  
嶷突而偕弁方欲以六經百氏播禮樂務忠孝正名器導  
人倫如蘭有芳心泉有清源兆德之階於是乎始使君曰  
昔陳亢喜聞詩聞禮聞君子之遠其子於孔鯉今茲贊之  
儕也其年或成人或幾成人學詩學禮則亦旣戒遠子之  
節吾事可不務哉於是考州之東四十里因僧居之外階  
庭戶牖芳草拳石近而幽遠而曠澶漫平田感沸溫泉可

以步而適可以濯而蠲謂爾羣子息焉遊焉贊質暨賡賞  
拜手稽首曰應惟惠施之車仲舒之帷蘇秦之錐三物畢  
具而郡廷溫清所在今也改晨昏爲旬朔夫豈不懷家人  
有嚴君焉惟命之受曰俾爾斲俾爾茨俾爾負則使君之  
材使君之堂使君之薪成且美矣安在其習定省之近儀  
哉抑又嘗聞迺祖安陽府君傳洪範九疇究天人之際贊  
等祇荷嚴訓述修祖德穆氏之門欲不大不可得也祐甫  
不腆幸與使君有郎省之舊考槃在阿歲聿云莫誰謂相  
遠駕言出遊旣覲邦君又適諸子之館使君第三子字紹

古於伯季之間肄文史考故實甚精而成因見謂曰丈人  
吾父之友也從事於游夏之門久矣盍以文見誨如賡也  
宜何文也祐甫應之曰僕朴人也徒有志於文知文之阡  
陌而不知其精粹請道其所見而紹古自執焉欲以文經  
邦者宜董賈欲以文動俗者宜揚馬言偃之文鬱而不見  
卜商有詩序其體近六經屈原宋玉怨刺比興之詞深而  
失中近於子夏所謂哀以思刻石銘座者取崔蔡論都及  
政者宗班張飛書走檄者徵陳琳曹劉之氣奮以舉潘陸  
之詞縟而麗過此以往未之或知宋齊以降年代未遠有

文之士胄系皆存議其優劣其詞未易故闕焉紹古曰盡書之因命筆而記之大厯七年十一月十八日檢校尚書吏部郎中博陵崔祐甫之辭也

滑亭新驛碑陰記

古之君子約已而裕人知飭而勤禮接賓以愿務施於豐鄭公孫僑論晉文襄之霸也官室卑庫無觀臺榭而崇大諸侯之館故來者如歸今我連帥尚書汧公爲國垣翰於東土軍禮肅人謠興新其亭傳以待賓客謀之有程設之有所力肆於悅巧悛於淫勿亟而成得其時制博敞高明

倬然其閨閤沈深奧密杳然其堂室論者謂華之普德號  
之閔鄉自昔爲郵亭之甲今茲白馬可以抗衡沂公仁以  
愛衆儉以化下陋居室而恢賓館節豐華而廣蔭庠稱時  
計功永代爲憲方操八柄揉此萬邦於以庇人其德宏大  
於是舉也見其端焉夫其去故就新之議屬徒揆日之制  
作而示後公實書之蓋聞傳春秋序風雅者邱明卜商之  
事也下吏敢亦庶幾

衛尉卿洪州都督張公遺愛碑頌

并序

今天子終諒闇易月之期不言既言之日詢於師保輔弼

之臣曰將以國之明燭震下土俾兆人康又有道哉四臣  
曰莫如擇賢而司牧之雖欲不理不可得也上曰用賢何  
先曰莫先於幽遠蠻貊之邦爲急也卽日命王人遽以制  
書就拜衛尉卿兼洪州都督張公爲御史中丞廣州刺史  
嶺南節度經略觀察等使踰月而遽廟於洪洪之耆老嫠  
惇商販漁釣百類千品周聲奪魄於野於廛咸曰寧取我  
裳而裂之寧取我廩而焚之父也天只胡爲奪我之君中  
丞受命而南舟不及汎馬不及秣國人懷慕之罔極曰清  
塵遠矣君不顧矣鬱陶之思何用哉盍用於揚名頌德乎

故吏兵曹參軍張擢法曹參軍豫章縣令鄭鋒建昌縣令  
盧惟瑾新吳縣令鄔賁州人東治府果毅劉容者壽喻乾  
相等討論之衆僉謂允於心曰自昔爲政者知清之可以  
長人也而清者稀豈不欲清欲率之也欲之所行不廉不  
儉爲之舟輿也清之不立肆奢崇貨爲之鑽鑿也於是撤  
其帷帳薦蓐之具便於身悅於目者二百餘物歸之有司  
減其俸錢稍食月幾十萬貫於軍府此皆前政之所督責  
而封已者我則推而遠之於是公儀之義申平仲之規見  
矣二之日謀於衆曰昔曹參去齊以獄市爲寄以爲擾於

獄者輕重人之命煩於市者耗斲人之生苟鞭笞桁楊之  
無度侵牟肆奪之不改是國家以章綬印璽毒蒼生也豈  
致理哉於是平百貨之貴賤議刑罰之等差使其貪不下  
殘忿不私逞韓子求環而不可使人袒背而無傷夫然噬  
嗑之象成行葦之恩溥矣三之日謀於野曰不稼不穡民  
天安仰載馳載驅王命所急吾觀是邦農野未闢傳置未  
脩豈不以使役無期供億失序倘野有餓殍賓不如歸亦  
諸侯之恥也於是減承城吏卒幾三千歸之隴畝而擊柝  
之守無闕焉賦豪富墾財數百萬闢於館餼而舍糗之徒



不知也其卒也不公之吏留以爲廝其財也不法之臣受以潤屋我皆用之於愛人活國也於是阜蕃之望崇多大之儀備矣從政三月州人愛之如父母承之如松柏夫婦耕織之暇無他懼惟懼公速遷其餘煦嫗孕育發於中而形於言損其身而益於物可以激頽俗慰窮甿者豈勝道哉祐甫山東鄙人不好妄飾凡所聞見務存實錄故採拾而書之公名休字祥幽州范陽縣人有晉司空茂先之遠裔也會祖汲易州長史祖選幽州固安縣丞考價贈齊州司馬公起家石亭別將自是爲縣令軍司馬州長史各一

入爲天子友儲君臣雖假以寵名而跡實戎索受命爲范  
陽節度安祿山判官祿山以大權大寵外示忠而內謀逆  
太上皇推赤心而勿疑敢有聞之者死蹈虎尾犯龍鱗公  
密言其戎狄豺狼不可厭也當是時也視鼎鑊如歸焉神  
之聽之是與正直周旋鋒鏑之下出入寇讐之間而能終  
保元吉漸於貴仕進退存亡而不失其正其惟張公乎又  
牧濠舒潤三州而及此昔張黃門庭珪牧此州甚得人譽  
張丞相九齡次之迨府君又有裕焉故邦人有三張之目  
頌者美盛德之形容非魯僖公仲山甫不之獲今茲頌曰

昔爲豫章今有循良黃門之善於今不忘爰及丞相亦有  
烈光我君戾止是爲三張立廉寶儉無怨無傷郵亭之下  
賓旅其康四封之內望歲千箱自春徂夏兮人相慶慶未  
畢兮聞後命朱幡玉節兮向番禺彼願適兮我望孤君乎  
君乎若歲大旱其誰見濡

故常州刺史獨孤公神道碑銘

并序

昔劉向稱賈誼言三代與秦亂之意其論甚美達於國體  
雖古之伊呂未能遠過又稱董仲舒有王佐之才雖伊呂  
無以加管晏之屬殆不及也於戲二君以偉才當盛漢之

崇而位止於下國二千石祐甫聞於先君僕射曰主恩非  
臣下之所圖天命豈生人之所制有唐碩量深識之士曰  
獨孤常州諱及字至之河南洛陽人皇朝左千牛元慶之  
曾孫蔡州長史思暎之孫殿中侍御史贈祕書監通理之  
第四子仕而遭時鵠立於朝建旗東夏三著嘉績嗚呼痛  
乎奄忽捐館其時也大厯十二年夏四月二十九日其地  
也常州之路寢其壽也五十有三年中朝名公素見知者  
後進之士聞義嚮風者洎濠舒常三州之百姓莫不填膺  
流背不宴不相浹辰彌月厚而惜之者往往失聲出涕沱

若公有子朗郁等年未齟齬厥兄檢校水部員外郎兼侍御史汜方佐浙河東帥聞喪來奔半旬而至惋毒之甚如不欲生既受吏人賓客之弔乃忍哀謀事以六月六日引使君之柩去常州歸洛陽其年歲次丁巳十月朔七日葬我使君於河南府壽安縣某原先祕監之塋以夫人博陵縣君崔氏祔焉禮也水部曰天之降割於我家仲叔季盡矣吾將老矣吾弟常州之子未立今不刻石表墓則常州之令名何以傳於後乃託我故人敘而銘之常州稟元和以生幼有成人之量祕監府君親授以孝經常州一覽成

誦祕監問曰汝志於何句對曰立身行道揚名於後世是  
所尚也自是徧覽五經觀其大義不爲章句學成童丁祕  
監憂勺飲不入口者累日先夫人同郡長孫氏諭以不可  
滅性之義由是微進饘粥杖而後起旣免喪加於人一等  
鄉族稱其孝焉長孫夫人高行明識訓導甚至常州漸教  
成器卓然有立著延陵論君子謂其評議之精在古人右  
天寶末以洞曉元經對策上第詔拜華陰縣尉著古函谷  
關仙掌二銘格高理精當代詞人無不畏服俄屬中原兵  
亂避地於越丁太夫人憂毀瘠過禮旣外除江淮都督使

戶部尚書李峘奏爲掌書記授左金吾衛兵曹參軍軍旅之事非其所好未幾返初服今上卽位下詔收俊茂舉淹滯政之大者以公爲左拾遺凡所諫諍直而不訐婉而不撓削藁詭辭不傳於外遷太常博士時新平大長公主之子裴倣尚永清公主初以太子少傅裴遵慶爲婚主將行五禮公實相焉中使口宣詔旨易以大長公主後夫姜慶初常州曰婚姻之禮王化之階以異姓之人主之不可甚矣某不奉詔中書令汾陽王時爲五禮使從焉又百官薨卒定諡之際綜覈名實皆居其當與嚴河南郢訓荅呂荆

州謹諡議博而正當時避之遷尚書禮部員外郎受詔考  
第吏部選人詞翰旌別淑慝朝廷稱正上方大卹黎庶精  
選牧守以公爲濠州刺史平其徭賦恤其冤弱課績聞上  
加朝散大夫遷舒州刺史舒境瀕江傍山羣盜所聚或蟠  
結林藪或趨趨城市公惠以柔之武以讐之釋矛服耒盡  
爲良俗其他如在濠之政居一年璽書勞問就加尚書司  
封郎中錫以金章紫綬屬淮南旱歉比境之人流移甚衆  
公悉心以撫舒獨完安天子聞而休之擢拜常州刺史常  
州當全吳之中據名城沃土兵興之後中華翦覆吳中州



府此焉稱大故朝之選牧恒屬意焉公宣中和平易之教  
務振人毓德之體百姓蒙化遷善不知所以安而安之吏  
不忍欺路不拾遺餘糧棲畝膏露降庭公平生聞人之善  
必揄揚之氣盡與之不啻若身得之後進有才而業未就  
者教誨誘掖之惟日不足公之文章大抵以立憲誠世衰  
賢過惡爲用故論議最長其或列於碑頌流於歌咏峻如  
嵩華盛如江河清如秋風過物邈不可逮公有集二十卷  
行於代若夫贊堯舜禹湯文武之命爲誥爲典爲謨爲訓  
人皆許之而不吾試論道之位宜而不陟前是公之仲兄

季弟伯姊三年之間繼歿執天倫之喪如荼如蓼竟以無  
祿天何不仁然則賈與董名位不盡其才吾先君之歎主  
恩天命斯見矣其銘曰

常州之德孝行爲大烝烝翼翼以敬以愛友於兄弟如捧  
如戴常州之義篤於朋友用之有恒行之可久扶危拯溺  
爾身我手常州之才施於有政撫柔三部謙以爲柄龔遂  
國僑千古迭映常州之文究其元本質取其深艷從其損  
在星之緯在衣之袞常州之年止於中身去昭昭之盛世  
與萬鬼而爲鄰白馬江上青烏洛濱脊鴿在原嗟爾元昆

線經霑血長號訴冤纂述遺美謂子不諼我見之子將二  
十年相投藥石胡疹不痊譬我於池子爲之泉譬我於桐  
子爲之絃榮不獨遂難不隻全如何淑明摧馥碎堅廠衣  
楚挽徘徊墓田望之不見赴之無緣狸首班如女手拳拳  
如天如天泣涕漣漣

代宗睿文皇帝哀冊文

維大厯十四年歲次己未夏五月二十二日寶應元聖文  
武皇帝崩於大明宮蓬萊殿遷座於大內二十六日景寅  
殯於太極殿之西階有司卽南郊定儀上尊諡曰睿文孝

武皇帝其年十月丁酉朔四日庚子將遷幸於元陵禮也  
東方啓明繁霜猶落風物淒於宮樹號啼隘於殷慕哀子  
嗣皇帝諱襲縗感若泣血漣如感備物之如在索明靈於  
太虛聆哀挽之急節懼靈駕之將引捧玉斝之獻歆望龍  
輜而不忍恭惟大孝終揚盛名爰命司籍光昭德聲其詞  
曰

於休我皇長發其祥咎絲翊舜種德四方元元去周闡流  
道光土實受命其牙則黃炎漢之後南北披攘天厭衆閔  
掃隋興唐有唐不烜帝命不叶豐融歲穰盛於八葉其盛

伊何聰明徇齊誕實匍匐聖敬日躋無幽不洞無遠不稽  
孝友濬哲聲達羣黎天寶季歲竟天長彗蛇騰犬瘞以螫  
以噬皇與南巡帝出朔裔君父命我爰整六師驅駕熊羆  
左右蠻夷逆徒蝘聚言刈其旂一鼓冰碎日未改時席卷  
鄴邑風清洛師天開地廓萬物斯睹安輿自蜀復於中土  
龍躍岐山正於九五帝子之孝軼邁千古子則戴親孫能  
敬祖乃登儲位問安三至一有元良儀形克類繼文纂緒  
道格元宮大明方中萬寓發蒙豈無桀驚化而爲忠豈無  
羿泥如燎遇蓬刑清政修遐邇懷柔王度如玉德音海流

欽定全唐文

卷四百九

崔祐甫

三

四靈皆擾三脊游羞方輯羣瑞登於介邱華封祝堯使聖  
人壽厥代何速奄捐九有天裂其高地傾其厚嗷嗷萬姓  
泣慕元首創鉅痛深寧丁我后嗚呼哀哉肅肅正殿自炎  
徂涼漏滴盡兮夏日永燭華凝兮秋夜長階有苔兮委積  
庭有草兮芸黃嗚呼哀哉七月之期同軌畢至匝野筮壤  
因山開隧捨清禁而不留指平原而出次嘉德兮啓闈承  
天兮敞扉抵廟門兮駐嚴蹕順孝心兮傷永違嗚呼哀哉  
出朱雀兮度青門恨六龍之若奔傾萬邦而會九族送吾  
皇兮歸壽原風颼颼而簫鼓慘日曠昧兮郊野昏植柏兮

青青彌岡兮亘崕俯杳杳兮重壤想森森之萬靈偶嬪嫁  
兮像閭寺捧廡衣兮拱下庭嗟備物之偕列奉元堂兮永  
寧嗚呼哀哉仙馭兮何之九虞兮有期總千官兮萬騎返  
城闕兮如疑功高舜典美冠周詩於億萬載昭昭有辭嗚  
呼哀哉

祭董大使文

維寶應元年歲次壬寅月日祭於隴西董府君之靈曰秋  
日淒淒百卉具腓城寺無主人焉適歸矧蓄廕庥之望翻  
遇死喪之威弔隨慶集事與心違良知與主昨是今非嗚

呼哀哉追惟曩歲永豐之遊清川倚棹廣路停輶道路契  
闊燕言綢繆倏焉陳迹會不少留幾成海變何啻星周勁  
翩翩翔上陵蒼蒼俯憐燕雀畏逼藩牆議以銜羽將貽稻  
梁望國駿奔初念褚中之惠及門問故俄增掛劍之傷嗚  
呼哀哉干旄檠戟撤而不見總蒙戶而風悲葦繞庭而靈  
泣邦人輟舂殲良何速屬吏霑襟於何從祿永無像於形  
儀庶有憑於軌躅羞匏葉而爲薦比隻雞而可續嗚呼哀  
哉尚享

祭獨孤常州文



維大歷十二年歲次月日外從祖舅朝散大夫權知中書  
舍人賜紫金魚袋崔祐甫遣表妣前鄧州南陽縣尉李綜  
以清酌之奠祭於從外孫甥常州獨孤使君至之之靈往  
矣至之此時何時空原拱木荆榛狐狸林風月露以子增  
悲子之往也高格遠量秀氣茂姿亡兮何若有兮誰對豈  
流蘇寓馬從之已而嗚呼哀哉王事適我政事一埤益我  
在籠而不能求其釋獨有懷君之淚臨秋風而自滴平生  
相期聊復一敘一以豁胷中之憤氣二以簡明靈而晤語  
吾與至之思宏道義自家刑國張維舉墜吾與至之思敦

交好平居琢磨遇死赴蹈吾與至之思邁純德言爲士準  
動有時則吾與至之思全高節風雨如晦嚶嚶不輟吾與  
至之思闡斯文不俾皋契獨謨華勛吾與至之談空覈元  
夢蝶喻筏去之蕭然吾與至之期諸晚歲偃臥山樊同披  
薜荔舉其大較良難名數念我交情千枝萬縷霜風掃葉  
或散或聚萬化紛然同歸野土向之所務孰云其主嗚呼  
哀哉爛然澄醑平昔共歡如何此奠取象於觀我思此飫  
子必吾劇目想道周暫留徒御所可懷者徐生之絮

裴士淹

士淹開元時官侍御史再遷司勳郎中代宗朝禮部尚書  
禮儀使坐善魚朝恩貶官

對大夫祭判

有五品祭寢不祭廟饌用索牛御史劾於寢則  
以陋於饌則以泰訴云禮令無違

命分九等以庸制爵禮有五經莫重於祭先王所以致理  
孝子爲能饗親乃如之人茲率厥典敬無忘於如在道有  
孚於不黷黍稷惟馨邊豆有楚哀樂相半必覩優然之容  
軒裳已登非復傷哉之歎且禮或豐殺法從沿革無廟於

金匱要略卷之四十一  
三〇  
寢在今令而則然求牲而饌徵古訓而奚失嗟夫御史所  
劾恐傷曾孫是宜

對不供夷盤判

三品喪事夷盤不供司儀云時所不要

凌人掌冰以待邦事深山窮谷居仲冬而益堅獻羔祭非  
事司寒而方出且云一日二日亦惟秋刷夏頒在用捨而  
有時於出納而惟允嗟此三品俄嬰六極金章罷去玉襪  
方開具厥衣於庭中設夷盤於牀下國之老疾猶或不遺  
朝之榮貴理宜從給徒以氣則分乎寒暑用則期乎折衷

司儀所告省括之道雖勤主者定詞挈瓶之智斯得

內侍陳忠感神道碑

夫北辰垂象南面居尊紫禁崇嚴彤庭奧密靜言近侍允屬能賢其誰見稱則有我陳府君矣公諱忠感字懷泰潁川許昌人也其先出自帝舜至闕父爲周陶正受封於陳子孫因以爲氏粵若尚書孝德頒賜聞乎題劔太守高義禮賢爲之下榻代襲堅貞門承軒冕因從官京邑今遂家於長安曾祖闕二字正議大夫內給事祖守節正議大夫內常侍父文叔銀青光祿大夫內常侍或肅或乂克寬克仁

好古而探墳籍懋官而紆青紫公幼懷端慤夙著嘉聞飾躬以筮仕服勤以成業先天歲解褐補內侍省掖庭局監尋轉內僕丞內僕令秩滿遷內侍伯內謁者監加朝散大夫恪居官次夙夜惟寅爰被丹霄之澤載延朱紱之慶典新樂之絲桐名與公偕勤亦至矣騁高衢而方遠何景命之不融以天寶十三年五月二日遘疾薨於輔興里之私第春秋六十有五惟公黃中多可素履居貞宅心知訓執事有恪至若怡神以全道體命以適時義以拯物禮以從政故能奉絲言而無失馳驛騎而有光俄拜內給事內常

侍尋除朝議大夫守內侍秩序斯崇恩華轉茂位益高而  
心益下德逾邁而氣逾和且以幹能尤膺任寄前後奉使  
者十有三焉至乃夢三清於太極之府是修功德志五樂  
於無何之鄉式瞻神異崇茲真廟獲彼靈符邁侯甸而訪  
仙經歷名山而隨羽客然後稽少陽之必舉懷令圖而允  
臧豈惟藝足侍書材優參乘巷伯刺讒之什史游忠益之  
規固可謂無競伊人溫恭淑慎者已以其年閏十一月之  
九日葬於長安縣承平鄉之原夫人上谷縣君成氏四德  
無虧三從罔失先天十四年正月二十九日後君而亡以

乾元三年五月七日合葬於舊阡禮也長子仙鶴昭武校尉左衛豐浩府折衝次子仙鳳振威校尉行右金吾衛左中候仙甫才惟博達職在春官今上御極釋褐特賜銀章朱紱拜內謁者監仙賢仙管等太邱父子荀氏弟兄事國以忠奉先惟孝感寒泉而增慕卜幽宅而罔艱懼遷陵谷式揚碑版銘曰

帝舜洪胄胡公令名三恪惟甫八代至成本仁祖義國史家聲椒聊之實莫我與京懿範彌昌宏材益振果行育德履信思順執心有恒改過不愆政符省括理必遊刃陟遐



自邇休有烈光飜飛省闈翊侍巖廊導宣國命輝耀銀璫  
丹誠每竭朱紱斯皇乘遠周流奚往非適瑞徵桃塞藥獻  
梁益新廟真容名山靈迹爰典樂正爰稽帝籍昊穹不愆  
殲我惟賢四星猶列一德空傳慘風雲於故里樹松楸於  
新阡載刊乎貞石永賁於幽泉

肅宗大宣孝皇帝哀冊文

維寶應元年歲次壬寅四月庚戌朔十八日丁卯大行文  
明武德大聖大宣孝皇帝崩於長生殿旋殯於兩儀殿之  
西階粵二年三月二十七日庚午將遷座於建陵禮也燭

列瑤宮河低象闕檐擁宵霧庭微曙月森鷺翮以成行儼  
龍輜而將發哀子嗣皇帝諱充窮感慕躡踊傷摧奠元辰  
而增肅瞻白雲而不迴兩泗噎兮千官泣天仗搖兮萬國  
陪懿業方永神暉潛翳迺詔有司騰芳後裔其詞曰

高邱演慶元牝開祥寶系攸重靈源自長文昭武穆累聖  
重光七葉增睿時惟我皇天帝褰裳全真養正窅然姑射  
欽哉有命謂禹知子踵堯傳舜伊昔休應虹流電驚猗蘭  
養德叢桂疏榮徇齊純孝宏裕欽明光含玉理秀發珠衡  
辨日多悟朝雲更輕尊師樂業問寢揚名三善克舉萬邦

以貞叶契斷金觀書羣玉性與兼愛道存濡足詢事考言  
登庸受籙運符提象輝同偶燭景星耀芒大風成曲戎羯  
緣間書稱猾夏轉旆秦川連兵朔野水靈潛衛山祇馮嘏  
順時徙邑聿來岐下用翦修蛇匪勤戎馬輯寧黎庶保乂  
宗社赫矣天府於皇樂都瑤壇饗帝璧沼崇儒進善求瘼  
明刑恤辜丹巖藏銑綠浦捐珠容成啓路王母獻圖功宣  
祀夏道洽歌虞物莫疵癘人用昭蘇櫟陽先惠棣華增睦  
冠帶麟洲賓延鳥服招諫懸鼓誓師推轂禮備樂和遠安  
邇肅恩猶覆燾義涵亭毒露臺愛費茅宇蠲奢北薦眷寶

南牧若華卿雲聳蓋雨露垂葩畝秀同穎階榮指邪滌慮

高居凝神下濟遠探仙訣深入真諦穆穆頌聲溫溫愷悌

榮鍾三古牢籠八裔才生之暨爰集良已之文莫繼佇襄

野而來巡怨祁宮而興沴嗚呼哀哉序分宏璧庭臨綴衣

如天落構象日徂輝棄璇寓而奚速啓金滕而遂違烏冊

龍圖之瑞青邱丹浦之威瞻脫屣兮如在痛攀髯兮不歸

巖岫晦兮愁雲積郊原空兮落景微嗚呼哀哉環瀛縞素

鞮譯凝慕龜謀協吉象耕遐赴珠玉重而不藏襲稱廉而

有數靜鉤陳於塋所閉閭闔於應路靡營南紀之塵空望

西陵之樹嗚呼哀哉蒼旻浩然緹律亟遷既深悲於寒霰  
俄隕涕於韶煙背鳳城而紆鬱援蜃紉而聯翩息輿駕於  
懸圃聞鐘磬於廣川神理冥其造物皇情邈以終天嗚呼  
哀哉三光猶變九丹非術蛭隧蒼茫鮒隅蕭瑟渡清渭而  
徐轉指甘泉而半出薤曲嘶管以臨風松門倚巖而蔽日  
嗚呼哀哉式敷末命戒茲羣后至德神功天長地久邁千  
祀之騰茂居百王之冠首俾下武而欽承彰典謨而不朽  
嗚呼哀哉

章敬皇后哀冊文

維寶應二年歲次癸卯閏正月乙巳朔五日巳酉大行章  
敬皇后啓自先殯十六日庚申膺冊禮於行宮粵三月二  
十七日庚午將遷祔於建陵禮也素帟遐敞彝罇曉薦風  
藹椒塗月虛蘭殿哀子嗣皇帝諱悲深元夜慟切聖慈爰  
講六服之禮允迪二南之詩示寰區以壺則恭典冊以台  
司鸞旒曳音蜃輅遷轍辭臣奉詔敢揚徽烈其詞曰

圓方配德耀魄齊明王化之本國風以清於穆宗盟貽謀  
先覺太伯崇讓延陵聽樂蘊夫純嘏施及繁昌斗維儲慶  
軒緯流祥入懷夢月滿室騰光蘋藻無替絃緹有章待年

祕景率禮含芳象服是宜造舟成詠顧史垂則稱詩展敬  
啓迪四聰誕敷六行蘭芬桂郁霜皎冰靜鶯集瑤筐鸞迴  
金鏡化光葛藟務先種稔載靡震驚宵淪眇眇柔明旣進  
陰教惟肅必戒浮華遠登才淑寧觀戲馬嘗往濯龍堯門  
協慶莘野聯蹤禕禮凝彩瓊珩有容志循簡易體備肅雍  
維德之行令問不已繡輪羽蓋玉階金甌式昭範於人倫  
竟韜華於地紀六宮揮涕於清禁萬寓銜冤於神理嗚呼  
哀哉宗祧永固濬哲膺期仁涵動植慶浹華夷捧鏡奩而  
增欷臨甲觀而纏悲望松楸兮逾遠感霜露兮何追湘川

有君漢陵宜耐容衛攸崇禮章加數瑞雲呈紫而轉妍  
服變黃而無蠹想層城於北闕背壽原於東路應門寂寂  
以長閉同軌麟麟而畢赴嗚呼哀哉閔泉闈兮有血引池  
緋兮方昭吟古木於靈囿遡悲風於渭橋繁笳凝而淒切  
輕旆轉而蕭條衣潛覆兮猶在香遠聞而不消嗚呼哀哉  
鳴雞奏而夙興服馬嚴而曉發慘河山之淑氣怨桃李之  
嘉月雖立極與觀圖繫馳光而裡設猗彤管兮有煒贊徽  
音兮無歇嗚呼哀哉



欽定全唐文卷四百十目錄

常袞

春蒐賦

浮萍賦

蕭昕等分祭名山大川制

禁藏天文圖讖制

禁僧道卜筮制

禁天下寺觀停客制

禁諸道將校逃亡制

停河南等道副元帥制

天下三等已上親赴上都制

勸天下種桑棗制

廢華州屯田制

授李季卿右散騎常侍李涵尚書右丞制

授崔昭右散騎常侍制

授能元皓左散騎常侍制

授郭晞左散騎常侍制

授蔣渙右散騎常侍制

授賀若察給事中制

授崔旻蕭直給事中制

授趙涓給事中制

授韋諤給事中制

授宋晦諫議大夫制

授李收諫議大夫制

授郝昂知制誥制

授庾準楊炎知制誥制

授孔述睿起居舍人制

授薛兼適左補闕制

授趙闡等右拾遺制

授郎士元等拾遺制

授崔圓左僕射制

授李忠臣右僕射制

授令狐彰右僕射制

授田神功右僕射制

欽定全唐文卷四百十

常袞一

袞京兆人天寶末舉進士累授起居郎寶應中選爲翰林  
學士考功員外郎中知制誥永泰初遷中書舍人加集賢  
院學士大曆元年遷禮部侍郎拜門下侍郎同平章事封  
河南郡公貶潮州刺史建中初遷福建觀察使四年卒年  
五十五贈左僕射

春蒐賦

以畋狩得時獻  
禽合禮爲韻

上方究心政理惕慮遊畋順時而行仁育之恩克洽酌古

取則春蒐之義攸先所以示軍容於有眾發號令於初年  
時維仲春景則清晝列武卒於天仗選龍媒於御廄野有  
鳴鹿爾則食君之苹巷無居人我亦從王於狩其儀可觀  
其理可究春者蠢也象其動以宣威蒐者求焉薄於求而  
在宥固將明其校閱非取樂於馳驟想熊羆之士必在於  
求賢驅貔豹之師寧惟於逐獸夫其將陳於野先訓於國  
執鏡備卒伍戰陣之教執錫盡進退疾徐之則六軍之節  
制可觀三畋之禮文斯得而原其初也勅司馬致高旗行  
火弊薙畬蓄彎良弓而發彼破修皆以斃之擇可取而克

成舊事捨將孕而用表深慈雖四海久清禮且崇於國典  
三冬尚隙役無奪於農時然後算其獲否以行賞勸皆賈  
藝以求功必極忠而上獻若然者豈徒倒逸材之獸落翰  
飛之禽大發以彰其武力小殺以宜其道心事且載於周  
禮跡寧誠於虞箴夫如是子雲無以諷其羽獵相如未足  
言其上林於是天旋景從颯軼電雜皮冠且進虞人之守  
斯存綵仗前驅天子之圍方合有司乃申誓人之詞具表  
貉之禮獻禽以報其生植充豆以遵其孝悌君子謂是蒐  
焉足觀國家之大體

浮萍賦

居洪泉而不根植者惟浮萍而已矣不懷芳以賈害不銜  
色以標美動不忤物卑以安已乘流則遊得坻則止如識  
變而知時似委命而順理故能無幽不涉無遠不尋隨長  
汀而自汎值驚浪而不沈既不遷其清濁亦何避乎淺深  
可以明逍遙之意可以警滯著之心然而推移河海凌歷  
隈澳潛緩而去遲水急而浮速秋遇楓浦與墜葉以齊奔  
春暖桃源共落花而相逐披拂丹藻搖演青蘋出入經其  
潭洞高下歸其齋淪擇利而行有似見機之士不常厥所



同乎漂梗之人歌曰大江之水東西流別有孤萍朝夕浮  
莫言此中長汎汎終當結實觸王舟

蕭昕等分祭名山大川制

勅有天下者祭百神蓋存乎統法也山川出雲而致風雨  
列在明祀其來久矣春秋傳曰水旱癘疫之不時於是乎  
禱之致其誠信與其忠敬精意以享則神明保佑命之不  
疾而速古之岳瀆秩視公侯以其所生者繁所濟也廣鎮  
厚地而不動朝滄海而不洩如是正直長發其祥百王相  
承五等不易先朝禮神以明德恭事以嚴禋進其位號崇

其典策用三代之樂金石必備合九州之味邊豆有加俾國之大臣每歲頒祀則執事而有恪亦莫不寧也朕纂戎八載外寇未平多廢舊章尚勞戎備巡狩之事有曠於虞書封禪之儀尚慙於漢史雖命方伯牧長以時致祭而事之不親誠有不達所以分遣八使禱於羣望各供於事以服官常宜令某官等分祭名山大川仍勅有司備具禮物敬陳明薦無失正辭

禁藏天文圖讖制

勅天文著象職在於疇人讖緯不經蠹深於疑眾蓋有國

之禁非私家所藏雖裨竈明徵子產尚推之人事王彤必  
驗景畧猶寘於刑典况動涉訛謬率皆矯誣者乎故聖人  
以經籍之義資理化之本仄言曲學實紊大猷去左道之  
亂政俾彝倫而攸敘自四方多故一紀於茲或有妄庸輒  
陳休咎假造符命私習星厯共肆窮鄉之辯相傳委巷之  
談飾詐多端順非而澤熒惑州縣誣問闕懷挾邪妄莫  
逾於此其元象器物天文圖書讖書七曜厯太一雷公式  
等準法官人百姓等私家並不合輒有自今以後宜令天  
下諸州府切加禁斷各委本道觀察節度等使與刺史縣

令嚴加捉搦仍令分明榜示鄉村要路并勒鄰伍遞相爲保如先有藏蓄者限勅到十日內齎送官司委本州刺史等對眾焚毀如限外隱藏有人糾告者其藏隱人先決杖一百仍禁身聞奏其糾告人先有官及無官者每告得一人超資授正員官其不願任官者給賞錢五百貫文仍取當處官錢三日內分付訖具狀聞奏告得兩人以上累酬官賞其州府長史縣令本判官等不得捉搦委本道使具名彈奏當重科貶兩京委御史臺切加訪察聞奏準前處分咨爾方面勲臣洎十連庶尹罔不誠亮王室簡於朕心

無近儉人慎乃有位端本靜末其誠之哉

禁僧道卜筮制

勅左道疑眾王制無捨妖言蠹時國朝尤禁且緇黃之教本以少思寡欲也陰陽者流所以敬授人時也而有學非而辨性挾於邪輒窺天道之遠妄驗國家之事仍又託於卜筮假說災祥豈直閭閻之內恣其誑惑兼亦衣冠之家多有厭勝將恐寢成其俗以生禍亂之萌明艱已來禁網疎濶至今此輩尚有矯誣害政之深莫過於此將歸正道必絕姦源宜令所司舉舊條處分

禁天下寺觀停客制

勅釋教本以助化道家先於理國懲惡勸善以齊死生薰然慈仁美利天下所庇者大所益者深故歷代崇尚而弗易也朕以元元烈祖慶我昌運西方聖人福茲下土常所盡敬敢忘致誠且至真之體尚於精潔流俗所尊不宜褻慢如聞天下寺觀多被軍士及官吏諸客居止狎而躪之曾不畏忌緇黃屏竄堂居毀撤寢處於眾設之門庖廚於廊廡之下緬然遐想慨歎良深自今已後切宜禁斷其軍士委州縣長吏與本將商量移於穩便處安置其官吏諸

客等頻有處分自合遵承仰勅到當時發遣應尊像有損壞處俾隨事修補其有諸神所居載在祀典靈跡昭著福及生人者如有毀廢亦宜增葺且王者以清淨統法聖人以神道設教精意所在感而遂通非徼福於朕躬期降祥於黎庶申明詔旨用悉勞懷

禁諸道將校逃亡制

勅軍興以來十有四載未息戎備尚勞師徒各以名數隸於麾管朕念三軍之勤役率萬姓以供饋躬自節儉而贍濟之定尺籍伍符厚其資糧屝屨掖庭織室俾給戎衣鈎

盾弄田亦調軍食推誠惠養靡不至焉雖感激忠義勇於  
赴難而差次官賞固不遺勞誠宜戮力以永所事如聞諸  
節度及團練使下官健多有逃入諸軍去其所從犯我明  
禁在於國令固合懲姦眷其戎勲尚容改過自今已後切  
宜禁止應有此色諸軍不得輒容差人遞還各付所統其  
額內官健有逃死者不須更填宣示軍州令知朕意

停河南等道副元帥制

勅古者分建戎號以張威武必因事而制亦有時而戢以  
天下征伐之重方鎮之大宜有總一則以元老撫和之乃



者國家平定之後

闕一  
字

理之始與其休息則以諸侯訓緝

之自河南之南至於滄海往屬難故久勞師徒連城之鎮

累百授鉞之將十數主其經畧委在台臣號令耳目以之

咨稟服柔滅叛罔不肅清今萬里無塵思解戎備況分閫

之重各任勲賢悉心憂國所統皆理何必更有

闕

屬適重

其煩軍書取決又失要會息人罷鎮

闕

亦便之河南淮南

西山南東等道副元帥宜停其兵馬宜充東都畱守兵馬

張延賞宜權知東都畱守事常休明宜充副畱守兼東都

鎮守兵馬使

欽定全唐文

卷四百十

常袞

七

天下三等已上親赴上都制

勅堯之敦敘以協萬邦周之宗盟必先同姓莫遠具邇懷德惟寧俾強捍於京師思同獎於王室所以洽中和之道明補察之義也惟我近屬聯華本支以文昭武穆之宗有錫土建侯之嗣往以艱難之際流寓頗多或僻在江山載經時序或雜居州里亦既淹畱等威不分無以自給儉將逼下卑或踰尊將恐合族展禮之文闕燕毛序齒之儀廢言念及此良深耿耿其三等已上親除州縣官及帶職掌應在外者委本道節度觀察量事給發遣赴上都仍先錄

名聞奏

勸天下種桑棗制

勅詩有豳風陳王業也八月剝棗以助男功蠶月條桑俾  
修女事贍人之道必廣於滋殖分地之利非止於耕耘益  
之以織絰雜之以果實則寒有所備儉有所資如旨蓄之  
禦冬豈無衣以卒歲頃屬多難艱食必資樹藝以利於人  
庶俾播種之功用申牧養之化天下百姓宜勸課種桑棗  
仍每丁每年種桑三十樹其寄住寄莊官蔭官家每一頃  
地准一丁例仍委節度觀察州縣長吏躬親勉率不得擾

人務令及時各使知勸一一勉諭訖具數奏聞

廢華州屯田制

勅間者戎旅未息徵求煩重四郊之賦乃至五稅其一居人蕩析邦廩空虛遂命宰臣大修農政天下郡國散諸屯田轉漕入關以資均濟兼詔中尉左右內史表屬州縣閑田分署農官俾其耕鑿南至於華瀕渭而東林麓州渚之間榛莽窳邪之處非吾人所占者悉舉籍勸分載芟載柞稼多農碩畝獲數鍾歲既少殷軍儲差贍郡縣之稅於是十而減七數從其舊殆復厥常今宿麥頗登秋苗益茂私

田加闢公用漸充華州人戶土地非廣其屯田並宜給以貧下百姓自頃關中乏牛力封圻千里半是邱荒置屯田已來皆變良沃惠散其利以及困窮藏之於人孰與不足宣示郡縣宜悉朕懷

授李季卿右散騎常侍李涵尚書右丞制

門下侍從出入贊清禁之事管轄糾正錄中臺之書多用儒雅必求公亮正議大夫守尚書吏部侍郎集賢待制隴西縣開國子賜紫金魚袋李季卿碩量寬宏雄詞典麗道素可尚風猷自遠銀青光祿大夫前行尚書右丞兼御史

大夫充河北宣慰使襄武縣開國公李涵文以禮樂主於忠信雅有學行通於理體並才望推重聲華茂著竭誠之效早見於艱虞從政之績備彰於事任簡廉無私純白不染守以直道行其至公載馳轡軒善喻中旨歷踐臺閣率由舊章拔選部之滯才畱左曹之駁議士林公族歸美攸多或久次懋官已深於滿歲或外除過禮且聞於踰月宜遷顧問之職俾膺總典之授季卿可守右散騎常侍餘如故涵可尚書右丞散官封如故主者施行

授崔昭右散騎常侍制

門下散騎以贊導侍從承答顧問前代參用言語政事之  
臣俾其盡規忠益以穆朝化也今位望逾重選之更精銀  
青光祿大夫前京兆尹兼御史中丞博陵縣開國子崔昭  
經之以文敏紀之以憲則直而不肆剛而能容精識知微  
長材致遠不易於風雨之晦不爭於險易之途常所委遇  
多在雄劇理平之美居最一時任畿甸千里之重齊趙張  
三王之政事當其適義合於權檢肅姦豪撫懷孤老資奉  
軍國從容瞻濟翼翼之化布於四方予欲左右有人訪求  
得失服茲舊列俾爾迴翔可守右散騎常侍散官封如故

授能元皓左散騎常侍制

門下聯八貂之貴同二府之品望尊而事不親地近而職  
非密蓋賢達之所尚俾勞臣而處休命所以廣其員而盛  
其選也太子賓客兼光祿卿上柱國河南郡開國公能元  
皓以忠烈自將以勇謀用師夷險一心精剛百鍊不奪之  
節貫於風霜殊常之勲銘在鐘鼎累更任遇休有令聞出  
入龍樓已先調護之列優游騎省載昇顧問之地可行左  
散騎常侍餘如故

授郭晞左散騎常侍制



勅切問之司實參朝議僉諧之命允屬時髦同朔方節度副使特進試殿中監察御史大夫充朔方先鋒司馬使上柱國太原郡開國公郭晞文武成器公忠亮節言多雅正理適經通詩禮之方服於庭訓韜鈴之畧稟自朝謀以少年之才雄有老成之持重俾張我武克定西疆業其勲以象賢大其門而出將兵嚴旣解朝選攸歸舉以令聞允茲近侍可行左散騎常侍散官勲封如故

授蔣渙右散騎常侍制

門下獻納之重周爰是咨必擇通賢用光近對銀青光祿

大夫光祿卿上柱國汝南郡開國公蔣渙德宏禮器學貫  
儒流孝友彰其令名文詞是其餘力合大雅之明哲達中  
庸之隱微清方有恒華皓益固直道而處風猷自高爰藉  
論思之才用膺侍從之事副予良選佇爾嘉言可右散騎  
常侍散官勲封如故

授賀若察給事中制

門下中散大夫行尚書吏部郎中賀若察講求學術藻飾  
藝文顧言行以檢身酌智能以經務任參六典選重一時  
從容管劇每識通而理當達練起草亦體大而思精罄猷

益茂公望維允分曹殿中職在論駁尚書奏議俾爾平之  
可給事中散官如故主者施行

授崔侁蕭直給事中制

門下銀青光祿大夫御史中丞東都留臺崔侁俊而能通  
和而有節朝議郎守太子左庶子賜紫金魚袋蕭直性資  
高朗識詣沖妙各以文儒致用貞亮處心持綱憲府必執  
其中贊事官坊允歸於正彰聞望於公器振英華於士林  
顧茲掖垣素用髦彥文昌奏議多所論駁俾承並命式副  
良選侁可行給事中散官如故直可守給事中散官賜如

故主者施行

授趙涓給事中制

門下朝議郎檢校尚書吏部郎中兼御史中丞賜緋魚袋  
趙涓純白高朗儒林表儀炳文揚彩時謂清拔早以賢良  
茂異服我周行歷踐三台之列嘗參二陝之佐其於事典  
多所精詳頃毗荆舒尋罷戎務近侍方缺選才正難評南  
宮之上書次東廂之奏事夙夜思職爾無面從可守給事  
中散官賜如故

授韋諤給事中制

門下通議大夫行尚書吏部郎中彭城郡開國公韋諤在  
人之德承家積厚先致美以施政終秉彝以存誠朝之清  
序多所階歷參我六典冠於諸曹學以辨疑文以決滯五  
年勤職時謂淹才宜守殿中以平臺議詔書未當實得封  
還官能守常事拙失中是有選用爾其揚之可行給事中  
散官封如故主者施行

授宋晦諫議大夫制

勅通議大夫檢校尚書兵部郎中兼侍御史上柱國宋晦  
忠潔簡惠和而不流理暢思精適於羣務位以才達政以

禮成往者理軍岐陽贊我戎事重艱貞之操義有可懷臺閣更拜久於清秩外掌邦賦任居其艱底慎均節以資經費事皆求當慮不及私積勞可書責實當進加以亮直行之有恒屬諫臣之高選參髦士之大用以匡不逮無伏嘉言可行諫議大夫散官勲如故

授李收諫議大夫制

勅書曰后德惟臣不德惟臣實賴左右前後有位之士匡其不及天子有諍臣職在司過若有犯無隱獻可替否則曠然丕變時惟休哉中散大夫前行尚書兵部郎中贊皇

縣開國男李收敏而好學文以彰之清澹寡欲不以得喪  
干慮往屬時難保茲艱貞事君之節足以存勸歷踐郎署  
率由舊章而仗雅居正可參諷議無或尸官以罔聞當灼  
見以箴闕也可諫議大夫散官封如故

授郝昂知制誥制

勅朝散大夫檢校尚書司勳郎中郝昂冲和簡朴不飾其  
外有雄俊之才可變風雅有精深之學實究儒元加以忠  
敬兼之亮直率由茲道可謂正人夫化成天下在於文匡  
朕不逮主於諫敷暢綸音箴規朝闕所掌皆重爾其懋哉

可守諫議大夫知制誥散官如故

授庾準楊炎知制誥制

勅中大夫行尚書吏部郎中上柱國庾準檢校尚書兵部  
郎中充山南副元帥判官賜緋魚袋楊炎等詔令之重潤  
色攸難其文流則失正其詞質則不麗固宜酌風雅之變  
參漢魏之作發揮綸旨其在茲乎爾各以茂才碩學敏識  
純行俾其對掌可謂得人仍轉郎位式光朝選準可行尚  
書職方郎中知制誥散官勲如故炎可守尚書禮部郎中  
知制誥賜如故



授孔述睿起居舍人制

勅宣議郎試太常博士東都河南江淮南等道轉運使判官孔述睿左右史正用第一流其選殆精於尚書郎也今東觀諸儒皆約注記而修簡冊事之當否多取正焉以某聖人之允歷代儒首博通古訓述作可傳出入起居期於秉直可守起居舍人散官如故

授薛兼適左補闕制

勅朝請郎前行萬年縣丞薛兼適兄弟致美士林推重詞清行潔政以幹稱在煩劇而有餘守貞方而不易文章侍

從朝夕論思參我諍臣以箴朝闕可行左補闕散官如故  
授趙闡等右拾遺制

誥獻再試文學考入第三等處士趙闡等或懿文清拔四  
科之美或純孝彰著百行之先或以言精梗概

闕八屬觀

風省俗頓網求賢幽滯靡遺精麤咸紀俾昇榮於中外庶  
有光於獎擢可右拾遺

授郎士元等拾遺制

勅前渭南縣尉郎士元等有君子之行有詩人之風頃尉  
於畿亦克用又匪躬之故無以易焉進思直言入告於內

勿使流議壅於上聞懋乃所職其無遺政可依前件

授崔圓左僕射制

門下左右丞相師長庶官無人則闕詔德而授以其久次  
是有轉遷特進檢校尚書左僕射知省事兼揚州大都督  
長史御史大夫充淮南節度觀察處置等使上柱國崔圓  
山東偉才忠厚成性文高大雅學富全經直道而行匪躬  
之故謀參經始節貫嚴凝嘗決議於廟堂早書勲於王府  
外綏戎政久鎮名都苦心恤人精力勤職圖艱思易適要  
除煩敦風化而少長有禮齊法令而軍戎知禁正身不渝

奉上彌恪有大賂南京之貢有浮泗達河之漕事多宏濟  
人不疲勞淮海晏然朕實毗倚寵章所以褒善大任所以  
寄賢俾升禮秩無替成命可檢校尚書左僕射餘並如故  
主者施行

授李忠臣右僕射制

勅文昌所以法成象端右所以長庶寮秦漢則內掌武事  
魏晉或外綏戎政今之垣翰重任勤勞有功歷踐六卿始  
終一德必訪羣議然後當盛選淮西節度觀察處置等使  
開府儀同三司檢校工部尚書兼安州蔡州刺史御史大

夫上柱國西平郡王李忠臣忠厚純茂信而可親寬肅靜  
深通而必正備五才之用有百勝之全往者寇孽亂常關  
洛多故爰奮其旅以先啟行大城名都所麾必克元兇巨  
猾傳首相望定齊休士有建威之得雋破趙會食亦淮陰  
之用奇漢東汝南專制千里總三軍之號令兼八使之澄  
清約已撫人守公遵職訓師以禮載寧於戎閫庀賦從薄  
繼入於王府四封不聳一紀于茲况忠衛之勲邦家是賴  
陝郊巡幸憂國存誠能釋位以勤王亦見危而致命疾風  
逾勁何日忘之申伯于蕃目當褒勸韓侯入覲宜有寵光

式是南宮俾崇禮秩可檢校尚書右僕射知省事餘並如故

授令狐彰右僕射制

勅中臺萬事之會端右庶僚之式所以總詳參貳恢演協宣勲德兼崇則殊在師長之重勤勞於外則不親損益之煩凡命此官必書於冊極茲朝選用屬時賢滑毫等州節度使開府儀同三司檢校工部尚書持節滑州諸軍事兼滑州刺史御史大夫上柱國霍國公令狐彰腹心純臣忠允明亮有張仲孝友之行有吉甫文武之才秉其直方資

以簡厚早擅韜畧尤工墨妙艱危致命出入勤王中興之  
勲羣帥難尚雖騾騎之北至高關淮陰之東下井陘積事  
度長抗衡異代自受任千里疆于兩河靖安軍戎肇正封  
域宏布風教宣明憲章優禮意於文吏洽仁化於吐俗息  
馬論道讓其保塞之勞愛人省刑守我中朝之典載修職  
貢以奉京師頃者復彼河流省其役費除歷年之所病匪  
踰月而成功開濟良謀東藩是賴不忘利國益見深衷予  
嘉乃休朝有明勸念齊侯之勞賜同申伯之封賞厚其禮  
秩允答奉公可檢校尚書右僕射餘並如故

授田神功右僕射制

門下萬事之本歸於司會百僚之師屬我端右所以綜詳  
名實參貳紀綱詔德選勞於是乎在開府儀同三司檢校  
兵部尚書使持節汴州諸軍事兼汴州刺史御史大夫充  
汴宋等州節度使上柱國信都郡王田神功忠敬孝友寬  
厚沈毅經之以詩書緯之以韜畧言能顧行勇必體仁信  
義不愆於風雨智謀自叶於蒼蔡早膺戎寄式是師貞有  
決勝合變之奇有明賞必罰之當精貫白日氣陵高秋馭  
盧龍之軍萬里橫海討淮夷之叛一戰平吳統制濟河懋



昭聲績往以犬戎內曩華夏多虞入勤服勞扈從能力忠  
衛社稷勲書甲令建牙移鎮在浚之郊守龜蒙晁繹之險  
當曹宋齊魯之會牧人馭眾憂國奉公宣文教以布朝章  
訓武經以明軍法修職貢之禮率先闔外通轉輸之利益  
瞻關中疆宇不聳田萊加闢風俗澄一河南晏然夫以勲  
業之崇而等威未峻報功優異豈允僉屬固宜副文昌之  
長總周官之任仍兼連率益重方隅可檢校尚書右僕射  
兼充本道觀察處置使餘並如故主者施行